

**Ким Ин Тэ
(тадқиқотчи)**
Фразеологик бирликлар ва лексикализация ҳодисаси

Маълумки, фразеологик бирликлар дейилганда, тилда тайёр ҳолда мавжуд бўлган ва нутққа шундайлигича олиб кириладиган, шаклан сўз бирикмаси ёки гапга ўхшайдиган, мазмуни кўчма маънога асосланган тил бирликларини ёки луғавий бирликларни тушунамиз.

Хозирги ўзбек фразеологияси фанида қабул қилинган қарашларга кўра, ФБлар муайян нутққа киритилгунга қадар ҳам мазмун, ҳам ифода планида шаклланиб бўлган ва тил истеъмолчилари томонидан шу ҳолатда англаб етилган ҳамда қабул қилинган бўлади. Бунинг маъноси шуки, ФБларнинг нутққа тайёр ҳолда олиб кирилиши уларни тил ҳодисаси сифатида эътироф этишимизни тақозо этади. Кўпчилик тадқиқотчиларнинг уларни тил бирлиги дейилишида масаланинг ана шу жиҳатини эътиборга олишган. Ҳатто Ф.де Соссюр ҳам «Умумий тилшунослик курси» асарида тилда шундай тайёр бирикмалар борки, уларнинг узуал характеристири маъноси ва синтактик хусусиятидан келиб чиқади. ...бундай бирикмалар тайёр ҳолда, анъанага кўра қўлланади, деган эди. (*Фердинанд де Соссюр. Труды по языкоznанию. – -M.: Прогресс, 1977, с.157. Таржима Б.Йўлдошевники. Каранг: 1, 4.*)

Фразеологизмлар, албатта, бирдан ортиқ сўзнинг бирикувидан таркиб топиб, сўз каби бир тушунчага асосланган маъно билдиради. Лекин, унинг таркибида бир нечта сўз бўлишига қарамай, бир сўз каби бир луғавий бирлик ҳисобланади. У, сўзлар бирлигидан таркиб топган бирикма ёки предикатив қўшилма қолипли бўлса ҳам, бирикма ёки предикатив қўшилма каби нутқ жараёнида юзага келмайди, балки тилда тайёр луғавий бирлик ҳолатида бор эканлиги ҳолда, нутқ учун шундайлигича танланади. Ана шу нуктада фразеологик бирликлар лексикализация ҳодисаси билан «кесишади» Шу сабабли фразеологик бирликлар ва лексикализация ҳодисасининг ўзаро муносабатини текшириш муҳимдир. Маълумки, лексикализация деганда морфема ёки сўз бирикмаси шаклидаги тил элементларининг мазмуни бир лексемага teng келадиган луғавий бирликка айланиш жараёни тушунилади ва ифода-мазмун планида лексикализацион бирлик ва ФБ ўртасида формал белгилар нуқтаи назаридан ўхшашликлар мавжуд эканлиги ҳам диққат қаратиш муҳимдир.

Ушбу ўринда гап ФБлар ва уларнинг лексикализация ҳодисасига муносабати ҳакида борар экан, юқорида таъкидлаганимиздек, бу бирликларнинг тил ҳодисаси сифатида қаралиши муайян аниқликларни талаб қиласди. Чунки ФБларга тил ҳодисаси сифатида қарашнинг ўзиёқ унинг лексикализацияга муносабатини аниқлашга ўтиб бўлмас ров қўяди. Табиийки, бундай пайтда ФБлар чиндан ҳам тил ҳодисасими, деган саволни ўртага қўйишга мажбур бўламиз. Алоҳида олинган лексема тил қурилишининг луғавий маъно англатувчи унсури сифатида тил ҳодисаси саналиши албатта, ҳеч кимда шубҳа туғдирган эмас. Аммо систем тилшуносликнинг нуқтаи назари бу борадаги тасаввуримизни кенгайтиради.

Ўзбек тилшунослигига систем лексикологияга оид қарашларни умумлаштирган, айни пайтда, бу борада ўз назарий мулоҳазаларини баён қилган X.Неъматов ва Р.Расуловлар қуидагиларни ёзишган: «...лексеманинг энг асосий хусусияти унинг «тайёрлиги», яъни ясама эмаслигидир. Демак, лексема муайян қолипнинг, муайян қонуниятнинг маҳсулни, ҳодисаси бўлмаслиги лозим. Масалан, [китоб], [уй], [биз], [ўғил], [кел], [кет], [қоч], [қол], [чўзиб], [ажойиб], [уч], [беш] каби минглаб тайёр бирликлар воқеликдаги нарса, белги, миқдор, ҳаракат, ҳолат, хусусиятларни атаб, ифодалаб келади. Улар жамиятнинг барча аъзолари учун тайёрлиги билан ажралиб туради.

Лексемаларнинг “тайёр”лик белгиси анъанавий тилшуносликнинг “туб сўзлар”, “ўзаклар” тушунчасига мос келгандай кўринади. Аслида эса бундай эмас. Ҳақиқатан ҳам,

анъанавий тилшуносликнинг “туб сўзлари” ва “ўзаклари” тилдаги лексемаларнинг нутқда воқелашишининг бир туридир» (4, 38).

Агар лексемага сўз деб қарасак-чи? Сўз - «лексеманинг нутқда муайян шакл ва вазифа билан воқеланган кўриниши. Ўз товуш қобигига эга бўлган, объектив нарса-ходисалар ҳақидаги тушунчани, улар ўртасидаги алоқани ёки уларга муносабатларни ифодалай оладиган, турли грамматик маъно ва вазифаларда қўлланадиган энг кичик нутқ бирлиги». (3,95).

Ҳ.Неъматов ва Р.Расуловлар ҳам сўзнинг нутқ бирлиги эканлигини эътироф этишади. «У лексемаларнинг ва сўз ясаш қолиплари ҳосилаларининг ўхшашлик ва қўшничилик муносабатлари асосида аниқланган, муайян шакл, мазмун ва вазифа кашф этган кўринишидир». (4, 54).

Одатда битта сўзга тенг келадиган лексема нутқ бирлиги сифатида қаралар экан, бир неча сўзнинг қўшилишидан таркиб топган ФБларни ҳам нутқ бирлиги деб атасимизга нима монелик қиласди? Бу сўзлар нутқдан ташқарида бўлган қандай ҳолатда ва қачон ибора тарзида бирикиб ултурган? Маълум бўладики, улар тилда турғунлашиб, маълум бир маънони ифодалайдиган ва тил истеъмолчилари учун тушунарли ҳолига келгунга қадар қандайдир ўзаро бирикиш, синтактик муносабат жараёнини кечирган бўлади. Ўз-ўзидан аёнки, бу бирикиш фақатгина нутқда амалга ошади. Турғунлашиш ва нутқда тил элементи сифатида, тайёр ҳолда иштирок этиш эса бу бирликлар ҳаётидаги иккинчи босқич саналади. Демак, улар мана шу ҳолатга келгунга қадар, яъни тил ходисасига айлангунга қадар ҳам нутқий жараёнда иштирок этиш вазифасини ўтаган.

ФБларнинг нутқий жараён маҳсули эканлигини тан олишгина уларнинг лексикализацияга муносабати хусусида мулоҳаза юритишимиизга имкон беради.

А.Э.Маматовнинг қўйидаги фикрлари масаланинг моҳиятини яна ҳам ойдинлаштиради: «...фразеологияни «кенг» ва «тор» маънода тушуниш нотўғри, уни битта маънода тушуниш керак. Улар қандай тил бирликлари деб тасниф қилинишидан катъий назар, афоризмми, мақол ёки маталми, турғун сўзлашув формулаларими, «қанотли сўзлар»ми, хуллас, агар улар фразеологизмнинг биз берган таърифига мос тушса, ундаги талабларни бажара олса, яъни тузилиши жихатидан сўз бирикмасига ёки гапга тенг бўлган, образли, умумлашган маъно англатадиган, лексик элементлари қисман ёки тўлиқ кўчма маънога эга бўлган, луғатларда қайд этилган ҳар қандай турғун лексик-семантик бирликлар фразеологик бирликлар доирасига киритилиши шарт». (2,212).

Айтилган фикрларни умумлаштирадиган бўлсак, яхлит ҳолда кўчма маъно англатадиган барча луғавий бирликларни ФБлар сифатида қараш мумкин бўлади. Аммо ҳар хилликдан қочиш ва аниқликка интилиш мақсадида бу борада Ш.Рахматуллаев айтган қўйидаги фикрга таяниб иш кўрамиз, яъни ФБ ларнинг икки гурухига эътиборимизни қаратамиз: «Фраземадан яхлитлигича англашиладиган маъно билан унинг таркибидаги лексемалар англатадиган маънолар орасидаги муносабат асосида фраземаларнинг икки семантик тури фарқ қилинади: 1) фразеологик бутунлик, 2) фразеологик чатишма.

Маъноси таркибидаги лексемаларга хос маънолар асосида изоҳланадиган, шу лексик маъноларнинг умумий маҳражи сифатида гавдаланадиган фразема **фразеологик бутунлик** дейилади.

Кўйидаги мисолларни қиёсланг: 1) *Турғун ота узоқ бои қашир, кейин бирдан енгин шимарар.* (О). 2) *Шундай қилиб, Тоҷибойнинг раислик даври тамом бўлди. Ойимхон Советнинг печатини ундан олиб, кўкрак чўнтағига солиб қўйди.* Ойимхон **енг шимариб** иши бошлиди (П.Т.).

Маъноси таркибидаги лексемаларга хос маънолар асосида изоҳланмайдиган, бу лексемаларга хос лексик маъноларни хисобга олмайдиган фраземага **фразеологик чатишма** дейилади.

Мисоллар: *Ҳадеб тўнингизни тескари кияверманг* (Н.С.), *Овчи узоқдан ўпкасини қўлтиқлаб чопиб келди* (Эртакдан»).

Фразеологик чатишманинг тилдаги иккинчи номи **идиома** дир.

Маълум бўладики, таърифларда зиддият йўқ, аксинча улар бир-бирларини тўлдиради.

ФБ ҳам тилдаги барча бирликларда бўлгани сингари ифода ва мазмун планига эга. Ифода планида унинг қурилиши тушунилади. Бу қурилмада камида иккита мустақил сўз (лексема) иштирок этиб, ўзаро синтактик боғланган бу сўзлар моҳиятига кўра бирикма ёки гапга teng бўлади (5,9-10). Демак, ифода планида улар сўз бирикмаси ёки гап шаклида бўлса, мазмун планида лексемага teng бўлади (маъно ҳамма вақт ҳам аниқ реаллашавермаслиги мумкин). Тадқиқотчилар *лексик сўз бирикмалари*, деганда ФБларнинг ана шу жиҳатларини назарда тутишган. «...мазмун планига кўра ФБлар лексик бирлик (сўз)ларга яқин турса, ифода плани жиҳатидан улар синтактик бирлик (сўз бирикмаси, гап)ларга яқиндир. Аммо ФБ сўзга ҳам, сўз бирикмасига ҳам, гапга ҳам тўла маънода teng эмас» (1,6). Бу айтилган фикрларнинг моҳиятини чуқурроқ англаш ҳам ФБларнинг лексикализацияга муносабатини аниқлашда маълум аҳамиятга эга. Бу бирликларнинг сўз ясалишига бўлган алоқаси ҳам ана шундан келиб чиқади.

К.М.Гюлумянц «Поляк тилидаги айрим турғун бирикмалар семантикасининг эволюцияси» номли маъruzасида қўйидагиларни баён қилган эди: «Эркин бирикмаларнинг турғун бирикмаларга ўтиш сабабларидан бири лексикализация жараёни бўлиб ҳисобланади. Фразеология соҳасидаги лексикализация деб биз бирикма таркибидаги алоҳида компонентлар семантик маъноларининг аста-секин сезилмайдиган даражага келишини, фразеологизмларнинг бирикма қисмлари маънолари устида турадиган умумий маънога эга бўлишини айтамиз» (6,239).

Масалани мана шу тарзда тушуниш ФБларнинг лексикализацияга муносабати масаласига яна ҳам ойдинлик киритади. Зоро, ФБлар компонентлари ўртасида синтактик муносабатлар мавжуд ҳолатлар улардаги лексикализация ҳодисасининг амал қилиш доирасини ҳам чегаралайди, ҳам равшанлаштиради. Мавжуд лексикализациялашиш қоидаларига мувофиқ келган ҳолатлардагина ФБлар лексикализацияси ҳақида гапириш мумкин бўлади.

Масалани мана шу тарзда қўядиган бўлсак, ўзбек тилидаги барча ФБларга ҳам лексикализациялашув талабини қўя оламиزم? Йўқ, албатта.

Фразеологик бутунликнинг маъноси унинг таркибидаги бирликлар лексик маъноларининг умумий маъносидан келиб чиқади ва улар тилда мавжуд бўлган маълум бир лексемага эквивалент бўлади. Масалан: *авж олмоқ* – а) ривожланмоқ. *Бригадада агротехника қоидаларига тўла риоя қилингани учун гўзалар барқ уриб авж олмоқда* (Р.Файзий); б) зўраймоқ, кучаймоқ. *Отишималар тамом бўлаётгандек бир нафас пасаяр ва яна авж олар эди* (П.Турсун); *азоб чекмоқ* – қийналмоқ. *Бригадир кўп вақтлардан буён жигар касалидан азоб чекарди* (Ш.Рашидов). (5,23).

Мисоллар мазмунидан шу нарса маълум бўлмоқдаки, *авж олмоқ* фраземасининг маъноси *авжланмоқ/авжланиш* сўзларининг *азоб чекмоқ* эса *азобланмоқ* сўзи маъносининг худди ўзи. Бироқ унинг таъсирчанроқ, орбазлироқ қўриниши, холос. Лексикализация ҳодисаси олдига қўйиладиган талаблар ишнинг аввалги қисмларида айтилганлардан маълум. Бу ҳодиса туфайли тилда янги тушунчани англатадиган янги бирлик ҳосил бўлиши лозим. Бу ерда шу талаб бажарилайтими? Саволга ижобий жавоб бериш қийин. Аммо мавжуд нарса-ҳодиса ёки тушунчанинг янгича ифодаси ҳосил бўлганлигини инкор этиб бўлмайди. Биргина *боши компонентли боши айланмоқ, бошига кўтармоқ, бошидан кечирмоқ, боши букилмоқ, боши эгилмоқ, бошига етмоқ, бошига келмоқ, бошига чиқмоқ, бошидан кечирмоқ, бошини ачитмоқ, бошини емоқ, бошини суқмоқ, бошини тиқмоқ, боши қотирмоқ, боши қотмоқ, бошини қотирмоқ, боши шишмоқ/говламоқ, боши қўшмоқ, бошини қўшмоқ* каби ФБларни санаб ўтиш кифоя.

«Ўзбек тилининг изохли фразеологик луғати»даги «А» ва «Б» ҳарфлар доирасидаги айнан шу қолипдаги бошқа ФБларга мурожаат қиласиз: *авра-астарини агдармоқ* – барча кирдикорларини очиб ташламоқ (7.24,28); *аммамнинг бузоги* – ландавур, лапашанг (7,26), *анқонинг урузи* – топилиши қийин, камёб (7,27), *аравани олиб қочмоқ* – мақтанмоқ (7,27),

арпасини хом ўрмоқ – ёмонлик қилмоқ (7,27), *белга тепмоқ/белига тепмоқ* – истамаган, кутилмаган ўринда халал етказмоқ (7,36), *бел боғламоқ* – шайланмоқ, отланмоқ, астойдил киришмоқ (7,35), *бели огримоқ/бели огримайды* – оғринмайды (7,36), *бел уиляшмоқ/бел боғлашмоқ* –куч синашмоқ (7,36-37), *бел огрытмоқ* – машаққат чекмоқ (7,37), *бир ёстиққа боши құймоқ* – оилавий ҳаёт кечирмоқ (7,39), *бир ўқ билан икки қүённи урмоқ* – айнан бир вақтда икки нарсаны құзлаб иш тутмоқ (7.40,44), *боши айланмоқ* – беҳуд бўлмоқ, мувозанатни йўқотмоқ (7,45), *бошдан оёқ* – тўла тўқис, бус-бутун (7,15), *боши огриқ* – ортиқча ташвиш, даҳмаза (7,55) ва бошқалар. Бу каби Фблар луғатда анчагина. Лекин улар аввал таҳлил қилинган *авж олмоқ, азоб чекмоқ* типидаги Фблардан нимаси билан фарқланади? Биринчидан, уларнинг маъноси бир сўзгагина тенг эмас. Бошқача айтганда, уларнинг эквиваленти бир сўзга ҳам, бошқа бир ФБга ҳам тенг бўлиши мумкин. Иккинчидан, улардаги кўчимга асосланган маънолар айнан икки сўзниңг бирикуви натижасидагина келиб чиқмоқда. Биз учун худди ана шу нарса муҳим. Чунки лексикализация ҳодисасида ҳам шундай жараён кечади. Таҳлил эса бизга Фбларнинг бу типини ҳам тил бирликларининг лексикализациялашиши самараси деб ҳисоблашимизга асос бўлади. Учинчидан эса, бу типдаги бирикувларнинг ўзбек тилида дастлаб тўғри маъно англатганлиги, кўчма маъно англатиш эса бирикма ҳолидаги тил бирлиги маъно тараққиётининг иккинчи босқичи эканлиги фикримизни қўллаб-қувватлайди. уларнинг айримлари ҳозирда ҳам ўзининг тўғри маъноларида яшаб келмоқда: *енг шимармоқ, ёқадан туттмоқ, оғзини очмоқ, оғзини ёпмоқ* каби. Масалан: Аммамнинг бузофини *етаклаб бозорга олиб бордим* – «Бектемирдан кўнглим тўқ, - деди Али тажсанг,- калласи ишилайди. Аммо Сафар чўтирир – у ҳам қўрқоқ, ҳам аммамнинг бузоги (Ойбек. Қуёш қораймас), *От ҳуркиб, аравани олиб қочди - Аравани олиб қочдинг, огайни. Гапга ҳам амиркон мойи суртиб, гирчиллатворадиган бўйсан-да* (С.Аҳмад. Орият), *Катталарнинг қистови билан ўтган иили арпа хом ўрилди, натижада уларнинг аксарият қисми панглаб кетди – «Хўш, ийгитча, қани, нима гуноҳи бор? Арпангни хом ўрдими у?»- қизиқсинди Ўқтам* (Ойбек. Олтин водийдан шабадалар) каби.

Фблар туфайли тилда янги лексема пайдо бўладими ёки у мавжуд лексеманинг эквиваленти бўлиб қоладими, деган саволга бу ўринда бироз кенгроқ тарзда жавоб бериш имконияти туғилади. Тилда *лапашанг, ландавур* маъноларини англатиш учун *амма* ва *бузоқ* сўзларининг ўзаро бирикувидан фойдаланилаётган экан, уни лексикализация маҳсули бўлган янги бирлик сифатида эътироф этишга тўғри келади. ФБ сифатида эса у тилда аввалдан мавжуд бўлган ва шу маънони англатадиган бошқа бир бирликнинг эквиваленти бўлиши ҳам мумкин.

Энди Фбларнинг *фразеологик чатиши* деб номланадиган қисмининг лексикализацияга муносабатини кўриб чиқамиз. Коидага биноан бу типдаги Фбларнинг маъноси унинг таркибидаги лексемалар асосида изоҳланмайды, яъни маъноси ўз таркибидаги сўзларнинг маъносидан келиб чиқмайди. Ҳатто унга зид маъно ҳам ифодаланиши мумкин. Масалан: *дунёни сув босса тўпигига чиқмаслик* – ўтакетган бегам, ҳаддан ташқари бепарво (5,76), *ерга кириб кетмоқ* – қаттиқ изза бўлмоқ, ўсал бўлмоқ (5,81), *ер тагида илон қимирласа, билмоқ* – ниҳоятда зийрак, сезгир (5,84), *ёстигини қуритмоқ* – бутун оиласи билан ўлдириб юбормоқ (5,89), *жигари эзилмоқ* (5,93), *жонини ҳовучламоқ* – бирор фалокатнинг воқе бўлишидан бенихоя қўрқкан ҳолда (5,100), *зардаси қайнамоқ* – жаҳлланмоқ (5,106), *икки оёгини бир этикка тиқмоқ* – жуда қийин ахволга тушмоқ (5,111), *икки қўлини оғзига тиқмоқ* – ҳовлиқиб, лозим бўлгандан кўра ортиқроқ нарсани рўёбга чиқариш (шунга эришиш) учун интилмоқ (5,113), *ичини им тирнамоқ* – яширин ҳолда рухан безовталашиб, ташвишланмоқ (5,116), *ичи қора* – ёмон ниятли, бошқаларга яхшиликни раво кўрмайдиган (5,117), *кулини қўкка совурмоқ* – бутунлай емирмоқ, йўқ қилмоқ (5,129), *қўзининг паҳтаси чиқмоқ/кўзи қинидан чиқмоқ/кўзи косасидан чиқмоқ* – ғазаби кўзида акс этиб, кўзи чақчаймоқ (5,145), *оёгини қўлига олмоқ* – чопмоқ, *тўнини тескари киймоқ* – ўчакишган ҳолда қайсарлик қилмоқ (5,238), *ўпкасини қўлтиқламоқ* – ҳовлиқмоқ каби.

Бу каби ФБларнинг маъноси унинг таркибидаги сўзларнинг маъносидан келиб чиқмаслигини лексикализация ҳодисасига учраган мураккаб бирикмаларни эслатади. Ҳосила маънонинг бирикмалар таркибидаги сўзлар маъносидан келиб чиқмаслиги ҳақидаги мулоҳаза фақат уларнинг тўғри маъносига тегишли эканлиги унутмаслик лозим бўлади. Ҳатто ҳосилада зид маъноларни ифодаланиши ҳақида фикр ҳам (А.Хожиев) компонентларнинг бирикувидаги лексикализация ва кўчимга асосланган.

Келтирилган Фбларни тўғри маънода тушуниш мантиқа мутлақо зид. Уларнинг ҳеч бирини реал ҳаётда амалга ошириб бўлмайди. Аммо амалга оширилган ҳаракатни бироз бўрттириб, муболағали тарзда ифода этиш эҳтиёжи тилдаги элементларнинг шу тарзда бирикувани тақозо этмоқда. Уларни тўғри маънода тушуниш қанчалик мантиқа зид бўлмасин, ҳаракатларни ўзаро боғлаб турувчи умумий яқинлик ва ўхшашик мавжуд. Биз уни *классема* тушунчаси орқали изоҳлаб беришга ҳаракат қилганимиз.

Шундай қилиб, Фбларнинг бу кўринишида ҳам лексикализация ҳодисасини кузатамиз ва уларнинг умумий жиҳатлари қуйидаги ҳолатларда намоён эканлигини таъкидлаймиз:

Маълумки, Фблардан англашиладиган маъно улар таркибидаги сўзларга хос лексик маъноларнинг оддий (арифметик) йиғиндиси бўлмай, устама маъно сифатида, шу билан бир вақтда кўчма маъно сифатида гавдаланадилар. Худди мана шу ҳолатни лексикализация жараёнида ҳам кузатамиз. Ҳар икки ҳолатда ҳам бирикма таркибидаги лексемалар ўз мустакиллигини йўқотади.

Фразеологизация ва лексикализация жараёнида бир сўз эмас, балки бирикма ҳамда унинг таркибида икки ва ундан ортиқ лексема иштирок этади.

Фразеологизация ва лексикализация ҳодисалари туфайли янги ҳосила маънолар юзага келади. Улар бутунлай янги бўлиши ёки мавжуд лексемаларнинг эквиваленти саналадиган луғавий бирликлар бўлиши ҳам мумкин.

Ҳар икки ҳолатда ҳам ҳосила шакл гапда бир вазифани бажаради.

Ана шу айтилганлар Фбларнинг юзага келишини ҳам нутқий жараён ҳисоблаб, уни фразеологизация деб аташимизга ҳамда бу жараённинг лексикализация ҳодисаси билан муштарак томонлари биз санаб ўтган ҳолатларда мавжуд эканлигини қайд этишимизга хукуқ беради.

Адабиёт

1. Йўлдошев Б. Фразеология тарихидан лавҳалар.- Самарқанд: Суғдиёна, 1998. –110 б.
2. Маматов А.Э. Ҳозирги замон ўзбек адабий тилида лексик ва фразеологик норма муаммолари. – Тошкент, 1991. –274 б.
3. Ҳожиев А. Тилшунослик терминларининг изоҳли луғати. – Т.: Ўзбекистон Миллий энцеклопедияси, 2002. –168 б.
4. Невъматов Ҳ., Расулов Р. Ўзбек тили систем лексикологияси асослари. – Тошкент: Ўқитувчи, 1995. –128 б.
5. Раҳматуллаев Ш. Ўзбек тилининг изоҳли фразеологик луғати. – Тошкент: Ўқитувчи, 1978. –408 б.
6. Гюлумянц К.М. Эволюция семантики некоторых устойчивых сочетаний польского языка // Материалы всесоюзной конференции по общему языкознанию «Основные проблемы эволюции языка», часть II. 9-16 сентября 1966 года. – Самарканд: Фан, 1966, с.239-242.
7. Ўзбек тилининг изоҳли луғати, I том. – М.: Рус тили, 1981. –632 б.